

2 Tsimoot

Ta jawén Tsimoot hã Paw-Ro ma erih do hahÿÿh

¹ Paw-Ro ÿ ti hÿÿh, P'op Hagä Do karën do hyb n'aa Kristo Jesus mejüü do see ÿ bahado däk doo. ÿ tamejüü ÿ baher'oot hyb n'aa ta wób sa hã, Kristo Jesus hã ji h'yy kae bä, hÿ pong jé ta pa had'yyt hë ji bawät da. Ti né hë ti ji hã taky n'aa enooh doo. ² Õm ÿ edëng Tsimoot, tah ÿ hadoo doo, ÿ kamahän doo.

ÿ karën P'op Hagä Do ër Yb, Jesus Kristo ër Wahë N'aa na-ãäj hë ky en'yym a hã. ÿ karën òm rat'yyd mehïin, baad òm rah'yyb n'yym.

Taw'ääts hë h'yy ganajëng doo me ji gadoo ji ahoop do ky n'aa hahÿÿh

³ P'op Hagä Do wë ÿ h'yy gadajang a hyb n'aa. P'op Hagä Do wë ÿ moo wät hëp ÿ hanäm doo me, wahëh ÿ makü rabahed'oo do paa da. ÿ hyb n'aa es'ee had'yyt hë òm ÿ ky n'aa etsëë bä, adëb bä ÿ ky n'aa etsëë bä, atsëm ÿ ky n'aa etsëë bä. ⁴ Tak'ëp ÿ karën òm ÿ bahegã paawä, tak'ëp ÿ tsebë hyb n'aa paawä. Hyb n'aa manabaan hã ÿÿ mabaoot do ër ketyn hõm bä. ⁵ Baad ÿ hyb n'aa esee nyy da t'õp madäk doo me mah'yy ka'eeh Jesus hã. ÿ hapäh, a hoonh Roots häd näng do hadoo, a ÿÿn Ew-Nis häd näng do hadoo né hë mah'yy kae däk. ⁶ Ti hyb n'aa, taw'ääts hë p'aa hënh mah'yy kadaw'uuh, baad mamoo wät hyb n'aa P'op Hagä Do Sahee anoo do paa a hã, a nuu gó moh ÿÿ ÿ dasooh noo gó. ⁷ Ta ti ÿ wén näng, P'op Hagä Do Sahee dooh ji eÿÿm bä tan'oo bä. Ji h'yyb tym tahej'oonh, ta karën do ji bahajaa hyb n'aa. Tanoo ji kamahän doo.

Tanoo ji hã ji bahajaa hyb n'aa ji h'yy keb'aah nesaa do hã. ⁸ Ky hebyy manã Jesus ër Wahë N'aa ky n'aa maher'oot do hã. Nu mebyy manã hëp ÿ n'aa, Kristo hyb n'aa ÿ radawäts gëët do hyb n'aa. Taw'ãäts hë P'op Hagã Do hejój me mabahoop nemon ÿÿ ër rarejã bã panyyg hanãm do hyb n'aa. ⁹ P'op Hagã Do né hë ti ër hed'ëëp do paa banesaa do mahãnh. Ër tasëew hõm tsyt hë ta wë, takarën doo da ër babok hyb n'aa. Ji mo haj'aa jawén nado ji tabasëew hõm. Ji tawén sëew hõm, sahõnh hë tadu dahäng do pooj jé tii da takarën do hyb n'aa. Kristo Jesus hyb n'aa taky enyym ër hã, ër takamahãn, nes'aa né paawä ëer. ¹⁰ Hÿÿ kã, Kristo Jesus, ji h'yyb tym dëëb bahyng do hã ër hã taky enyym, ër takamahãn, ër hã tametëëh. Kristo ahäj jëng dajëb hejój paah. Ër da genyyh. Ta ky n'aa hanãm do hã tametëëh ër hã ji edëb had'yyt hë do tyw n'aa. ¹¹ P'op Hagã Do ÿ tasëew hõm, ta ti ky n'aa rod, Jesus mejüü do na-ãäj hë ÿ bahadoo hyb n'aa, ÿ ma metëëk hyb n'aa ta ky n'aa. ¹² Ti hyb n'aa ÿ bahoop ÿ radawäts gëët doo. Ti hado né paawä ÿÿh, dooh ÿ hebyy bã ta ti hyb n'aa. ÿ hapäh ta ti ta hã ÿ h'yy ka'eeh doo, Kristo. Baad ÿ bahapäh ta ti tahajaa baad tabahag'ãäs ta ky n'aa hã ÿ tanoo doo, tamatëëh bã kã.

¹³ Menyyw had'yyt hë a h'yyb gó a hã ÿ ma met'ëëg wät doo. Taw'ãäts hë hadoo do ky n'aa né tii. Taw'ãäts hë Jesus hã mah'yy kae had'yyt hë. Taw'ãäts hë sahõnh hë makamahãn had'yyt hë. Ër hajaa Jesus hã ër h'yy ka'eeh, ta wób ër kamahãn, séd ër h'yyb hedoo do hyb n'aa Kristo Jesus hã. ¹⁴ P'op Hagã Do Sahee ër h'yyb gó hawät do hejój me baad manã a hã P'op Hagã Do anoo do paah, ta ky n'aa, ta see hadoo tanadoo hyb n'aa da.

¹⁵ Mahapäh né hë, sahõnh hë Jesus hã h'yy ka'eeh do Asija häd näng do häj n'aa bã hena do ÿ raberéd wät. Pigeer, Emok häd enäh doo, ti na-ãäj né hë ÿ reréd wät.

¹⁶ Ỹ karĕn Tak'ĕp Hyb N'aa Jawyk Do t'yyd mehĩĩn Onesip, ta tób yt haj'eenh do na-ããj né hĕ, hajõõ nuu me ỹ h'yy gadajang tan'oo bã do hyb n'aa. Dooch tanu mebyy bã hĕp ỹ n'aa, ỹ radawãts gĕĕt do hã. ¹⁷ Roma bã takajaa noo gó, baad ỹ tabesoos jé pad'yyt hĕ, ỹ tawyyd kãn. ¹⁸ Ỹ karĕn Jesus Kristo, ĕr wahĕ n'aa, t'yyd mehĩĩn Onesip hã, sahõnh hĕ P'op Hagã Do ky n'aa etyy noo gó. Baad mabahapãh né hĕ tak'ĕp ỹ Onesip masa paa Epeso hãd nãng do panang bã.

2

¹ Ōm kã tah ỹ hadoo doo, tak'ĕp h'yy kahejój Jesus hã mah'yy ka'eeh do hã. Ōm da Kristo Jesus h'yyb hej'oonh, ky enyym do hyb n'aa a hã. ² Ta ti mamaa napãh do ỹ metĕĕk doo, hajõk her'oot doo, ỹ karĕn matab'ĕĕs ajyy baad hadoo do sa hã, ta wób rama metĕĕk hajaa doo kã.

³ Warahĕn baad habok do raky daheeh sa wahĕ n'aa kyyh, ragadoo na-ããj hĕ rahoop doo. Ti hadoo taw'ããts hĕ nemon ỹỹ magado Tak'ĕp Hyb N'aa Jawyk Do hyb n'aa ji ahoop do sa mo haj'aa, ji ky n'aa rarejãã do na-ããj né hĕ. ⁴ Warahĕn baad habok doo, dooh rah'yy kawapĕĕn bã warahĕn nadoo do ramoo bok do hã. Tii d' rawĕn d'oo, sa wahĕ n'aa rah'yyb en'yym do hyb n'aa. Ōm na-ããj hĕ, Jesus Kristo warahĕn n'aa hadoo mabahadoo do hyb n'aa, h'yy kawapĕĕn manã Jesus ĕr wahĕ n'aa manejũũ do hã. ⁵ Jé tsyym kas'ỹỹ doo, wajaah doo, dooh tagado bã j'aa ketsĕ do sãm, kas'ỹỹ do ky n'aa jaw'yyk do taky nadahĕ bã. Ti hyb n'aa taw'ããts hĕ kas'ỹỹ doo, waj'aah do hadoo mabad'oo. Taw'ããts hĕ baad maky daheeh Jesus õm tamejũũ doo. ⁶ Taw'ããts hĕ jé gĕĕw gó tak'ĕp moo wãt doo, pooj jé tagadoo ta joom s'ĕĕb. Taw'ããts hĕ tii d' mabahadoo. Tak'ĕp baad ub mama met'ĕĕg, mamaher'ood Jesus ky n'aa, ta sãm magadoo hyb n'aa.

⁷ Mahyb n'aa newë ta ti a hã ÿ her'oot doo. Tii d' madoo bä, òm P'op Hagä Do h'yy gan'yyh sahõnh hë mabahapäh hyb n'aa takarën doo.

⁸ Jesus Kristo mahyb n'aa es'ee, ganä wät do dajëp do paa P'op Hagä Do an'oo bä, Dawi makū panaa paah. Ti ky n'aa hanäm do rod n'aa ÿÿh. ⁹ Ti ky n'aa hyb n'aa ÿ rarahejãã, ÿ rawén moo maw'yyd däk haak sapuuw hadoo doo me. Mo haj'aa dahej'ëëp do hadoo ÿ ran'oo bä. Tii d' né paawä ÿ rabad'oo, P'op Hagä Do kyyh dooh takamaw'yyd bä. Dooh mesoo péh. Ta ti awäd had'yyt hë badäk hahÿ haw'ãäts hë. ¹⁰ Ti hyb n'aa ÿ gadoo né hë ÿ ahoop do sa mo haj'aa. ÿ wén gadoo tii, P'op Hagä Do asëëw hõm do sa hyb n'aa, ramaa napäh hyb n'aa ta ky n'aa, sa h'yyb Kristo Jesus bed'ëëp hyb n'aa, banäm doo hënh ta sii ta bag tak'ëp gabarëëh do mahang rababoo had'yyt hë hyb n'aa.* ¹¹ Te hub né hë hahÿÿh:

Kristo hyb n'aa ji dajëb bä,
ta sii ji baboo däk da.

¹² Ji gado bä had'yyt hë ji ahoop do Kristo hyb n'aa,
ji bag'ãäts da ta sii.

Kristo ji ky n'aa jejën bä,
ji na-ãäj hë ta ky n'aa jejën da P'op Hagä Do hä.

¹³ Dooh né paawä baad ji awäd bä had'yyt hë Kristo sii,
ji tahagãã had'yyt hë,
ji takamahãn had'yyt hë.
DooH tahaja ta daaj hë taky kehÿÿd bä.

Taw'ãäts hë ji moo wät P'op Hagä Do gen'aak do ky n'aa hahÿÿh

* 2:10 Paw-Ro ky dawuh bä paawä tanahoop hyb n'aa, dooh paawä raky n'aa napëë bä Jesus ky n'aa. Dooh redëb bä tii bä P'op Hagä Do wë. Ti hyb n'aa Paw-Ro gadoo tahoop doo.

¹⁴ Mamaher'ood ta wób sa hã a hã ÿ her'oot doo. P'op Hagä Do matym gó mamejõ sa hã raky kaned'aak hyb n'aa kyy p'ãã. Dooh baad tado bã ji ky kedak doo. Taw'ãäts hẽ nado ti maa new'ëë do sa hã. Tarejãã maa new'ëë doo.

¹⁵ Taw'ãäts hẽ baad mama met'ëëg P'op Hagä Do ky n'aa, P'op Hagä Do gadoo hyb n'aa mamoo wät doo. Taw'ãäts baad hadoo do moo wëed mabahadoo. Baad ÿ wén karën mamoo wät, manu manebyng hyb n'aa mamoo wät do hã, baad ub mama metëëk hyb n'aa baad hadoo do ky n'aa.

¹⁶ Mamaa newë manäh, P'op Hagä Do nahapäh do her'oot doo da her'oot doo, daap hadoo do ky n'aa her'oot doo. Er'ood manä sa sii. Dewë hã magyys hẽ ta ti hedoo do rababoo däk P'op Hagä Do mahãnh. ¹⁷ Kah'ũũm rama metëëk doo, nahëë saraa ji hã ket'ëë hõm do hadoo. Ti hyb n'aa, awäd manä sa mahang. Imenëw, Piret häd enäh do ta ti hed'oo do sa wób. ¹⁸ Reréd hõm baad hadoo do ky n'aa. Èr ganä wät paah, sa nooh. Dooh ji ganä wäd bã ta jawén, sa nooh. Daap ta tii d' rama metëëk. Ti hyb n'aa sa kyyh maa new'ëë do wób dooh baad raky dahé boo P'op Hagä Do panyyg. ¹⁹ Tii d' nado P'op Hagä Do kyyh. Te hub né hẽ tii. Tahajaa ta kyy hã ji h'yy kasadëë bã. Dooh taky kahÿÿd bã. Hahÿÿ da P'op Hagä Do kyy kerih doo: “Tak'ëp Hyb N'aa Jawyk Do hapäh ta hã h'yy ka'eeh doo.” Hahÿÿ da ji tamejũũ: “Taw'ãäts hẽ nesaa do mahãnh dawëë rakan'lyh Jesus sa wahë n'aa ramaneëënh doo.”

²⁰ Tak'ëp ma näng do tób bã ti anäng waa hood k'ãäts tęg gabarëëh do s'ëëb ta wób, k'ãäts tęg hawak do s'ëëb ta wób. B'aa s'ëëb, tsäng s'ëëb hedoo do ta wób. Ky n'aa gebah do s'ëëb, hanäm do hood tii. Ky n'aa ganebah do s'ëëb, hanäm do hood nado tii. ²¹ Ti hadoo Jesus hã h'yy ka'eeh do sa hã. Ji daaj hẽ baad ji kanä bã nesaa do mahãnh, hanäm do hood hadoo ji. Hanäm do ji moo wät hyb n'aa, ji P'op Hagä Do asëew hõm tsyt hẽ. P'op Hagä

Doo, ər Kariw N'aa ma hã ər hajaa ər moo boo bä tii bä, tsyt hẽ ər tabasëew hõm do hyb n'aa. ²² Ti hyb n'aa baad kanä pahëew h'yib hadoo do nesaa do hã mahãnh. Taw'ãäts hẽ baad hadoo do hã mah'yib däg. Mahũüm had'yit hẽ Jesus hã mah'yy ka'eeh doo. Mahũüm had'yit hẽ P'op Hagä Do makamahãn doo, a da hadoo do makamahãn do na-ãäj né hẽ. Mahũüm had'yit hẽ a h'yib hanãm do sa hã. Tii da ŷ karën mabad'oo ta wób sa sii, h'yib nãm doo gó Jesus hã raber'oot do sa sii.

²³ Mamaa newë manä daap ke'aanh doo, daap kaher'oot doo. Mahapäh ti né hẽ du n'aa kawajãän doo gó raky kedak doo. ²⁴ P'op Hagä Do sii moo heb'ook doo, Jesus hã h'yy ka'eeh do sa wahë n'aa, taw'ãäts hẽ dooh ky ked'aak do rado bä. Taw'ãäts hẽ kaja hẽ denaa hẽ sa h'yib ramahũüm sahõnh hẽ sa wë. Taw'ãäts hẽ da baad rama metëek. Taw'ãäts hẽ dooh rennyw bä h'yy gaënh doo. ²⁵ Taw'ãäts hẽ kaja hẽ denaa hẽ rama metëek sa hã ganen'aak doo. Nepäh P'op Hagä Do h'yib wareem bä, baad hadoo do ky n'aa rabahapäh, raky daheeh hyb n'aa. ²⁶ Ta tii kä baad däg p'aa hënh sa h'yib tym hanãm do hã kä. Baad rakanä däk tii bä sa hã Dijab† wadii do mahãnh, tamesoo do paa mahãnh. Ta ti hedoo do Dijab mesoo do paa hadoo, takarën do ramoo bok hyb n'aa.

3

Sahõnh hẽ gawatsig hõm do pooj jé panyyg n'aa hahÿÿh

¹ Mahyb n'aa es'ee ti hahÿÿh: Sahõnh hẽ gawatsig hõm do pooj jé, tak'ëp da tanesaa ji hã. ² Sa hã hẽ had'yit hẽ rahyb n'aa newëë da ti noo gó. Rahyb n'aa hũüm magyys

† 2:26 Gereg kyy me ramaneëënh Nesaa Do Yb, Dijab. “Ji taky n'aa tapa had'yit doo”, tahanäng pé ti Dijab.

hē da sa ma. Sa daaj hē raj'aa etsē da. Sa hā hē rah'yy kasab'ee da. P'op Hagä Doo, ta wób na-ãāj hē raky n'aa rejã da. Sa yb, sa ÿñ, dooh d' raky dahé bã. Dooh d' taw'ãäts hē tado sa hā ragadoo doo. Dooh da P'op Hagä Do rawehëe bã. ³ Dooh da rakamahãñ péh. Maneban sa da hadoo do sa mo haj'aa. Ta wób da ranu mer'oot, raky n'aa rejã da. Dooh da sa h'yyb ramedug bã nesaa do hā. Dooh d' rat'yyd mehĩn péh. Sahõnh hē da rarejã rakarēn doo da. Dooh d' ragenaag bã baad hadoo doo. ⁴ Baad raky kenāw né paawā, ta wób da raky n'aa her'oot sa majĩ hā. Daap hē ragado nyyh sa h'yyb tym. Sa daaj hē sa hā rabahajaa, sa hā. Rah'yy karēn do rakamahãñ da. Dooh da P'op Hagä Do hā rakamahãñ bã. ⁵ P'op Hagä Do karēn do ramoo bok ji edoo né paawā, j'ooj madāk doo me tii d' rabad'oo. P'op Hagä Do hejój raty n'aa ges'yyk. Dawëe kanā da ta ti hedoo do sa mahãnh. ⁶ Ta ti rah'yyb wedii ragadoo hyb n'aa sa tób bã. Tii bã rahajaa rawedii ÿÿj wób h'yy gatamah doo, ta ti ÿÿj raky sũüt hyb n'aa rahe'oot doo. Ta ti hedoo do ÿÿj hajõng sa hā nesaa doo, nesaa do jawén sa h'yyb tym bawät do hyb n'aa. ⁷ Ta ti hedoo do ÿÿj ta tii d' had'yyt rakarēn rama kametëek, dooh paawā rahaja bã rah'yy kadawuung bã baad hadoo do ky n'aa hā. ⁸ Ta ti hedoo doo ma matëg oow, baad hadoo do ky n'aa majĩ tii. Janes, Jãm häd enäh do hadoo tii, Mosees hā rah'yy kawapëen do paah. Baad nado wäd ta ti sa h'yyb tym. Dooh P'op Hagä Do karēn wäd ta tii, heh'äät ub nadoo do hyb n'aa ta hā rah'yy ka'eeh doo. ⁹ Sahõnh hē rah'yy genäh da sa hā. Ti hyb n'aa dooh da rahũüm bã ta bahãnh. P'ooj ub habok do paa hadoo da, Janes, Jãm häd enäh do paah.

Taw'ãäts hē ji ky dahé had'yyt hē P'op Hagä Do panyyg ji hā rama metëek doo

¹⁰ Mahapäh né ti ŷ ma metëek doo, nyy da ŷ bawät do baad ub, h'ëed hyb n'aa ŷ bawät. Mahapäh né ti nyy da ŷ h'yy ka'eeh P'op Hagä Do hä, nyy da h'yyb jawyk doo gó ŷ bawäd wät, nyy da sahõnh hē ŷ kamahän, nyy da h'yy ganajëë hõm doo me ŷ bawät ŷ rarejã né paawä. ¹¹ Mahapäh né hē nyy da ŷ rarejãã, nyy da ŷ bahoop do sa mooh. Mahapäh né hē ti nyy da ŷ rano n'aa masoo panang Än-Tijoka, Ikonijo, Ris häd enäh doo bä. Sahõnh hē ta ti ŷ ahoop do mahänh, ŷ rarejãã do mahänh ŷ P'op Hagä Do ed'ëep. ¹² Sahõnh hē P'op Hagä Do karën doo da hawät do karën doo, Kristo Jesus karapee rabahadoo do hyb n'aa, rarejãã né da. ¹³ Nanäng ky nesaa doo, j'ooj madäk doo me ky ken'yym doo, ti bahänh däg da sa hä nesaa doo. Rawedii da ta wób, ta ti rawedii na-ãäj né da sa hä. ¹⁴ Õm kä, baad maky dahé had'yyt hē ŷ karën, a hä rama metëek do paa hä. Mahapäh né ti baad a hä mama kametëek do paah, baad mabahapäh hyb n'aa õm ma metëek do paah. ¹⁵ Õm karapee noo gó õm rama met'ëeg wät tak'ëp hanäm do P'op Hagä Do kyy kerih doo. Ta ti õm tah'yy gan'yyh, mabahapäh hyb n'aa nyy da õm P'op Hagä Do bed'ëep Kristo Jesus hä mah'yy ka'eeh do hyb n'aa. ¹⁶ Sahõnh hē P'op Hagä Do kyy kerih doo, P'op Hagä Do né hē ti hanoo. P'op Hagä Do né hē ti h'yy gan'yyh raberih hyb n'aa. Ta tii hä baad ub panyyg hanäm do ji metëek. Ta tii hä ji metëeh ta wób sa hä resõõts hõm doo. Ta tii hä ji ma metëek ny hadoo do ji eréd hõm doo. Ta tii hä ji metëeh nyy da P'op Hagä Do karën doo da ji bawät. ¹⁷ Ti hyb n'aa kä, ramaa newë bä, raky dahé bä, baad né hē P'op Hagä Do karapee rabahajaa ramoo boo bä sahõnh hē baad hadoo do P'op Hagä Do karën doo.

4

¹ Kristo Jesus matëeh bä kä taky n'aa etyy da sahõnh hē

badäk hahÿÿ hã habong doo, hedëp doo, dejëp do na-ããj hẽ. Ti awät do hyb n'aa, tadu doo do hyb n'aa tabag'ããs doo, P'op Hagä Do matym gó, Kristo Jesus matym gó na-ããj hẽ òm ÿ mejüü hahÿÿh: ² Maher'ood panyyg hanäm do sahõnh hẽ sa hã. Maher'ood sa hã rakarën bã ramaa newë bã, rakanarën bã na-ããj né hẽ. Maky geãm sa hã baad ranaboo bã. Manabuuj gedo baad nadoo do moo bok doo. Mah'yyb tsebé sa hã, baad hadoo do ramoo bok hyb n'aa. Taw'ãäts hẽ h'yyb jawyg gó mama met'ëëg sa hã. ³ Tii d' ÿ wén karën mabad'oo, ti awät do hyb n'aa ti noo gó dooh rakarën bã ramaa newë bã panyyg heh'äät ub do hã ma kamahetëk doo. Resoos da sa ma matëg n'aa, ragen'aak do rama metëëk hyb n'aa sa hã. Tii da rawén d'oo, rah'yy karën doo da rababok do hyb n'aa. ⁴ Raty n'aa ges'yyk da baad hadoo do ky n'aa. Ramaa newë däg kãn da panyyg daap menyuh doo. ⁵ Õm kã, baad menyuw had'yyt hẽ a h'yyb tym kã. Magado Jesus hyb n'aa ji ahoop do sa mo haj'aa, ji ahoop do ji raky n'aa rejãã doo. Maher'ood Jesus ky n'aa hanäm do ta wób sa hã. Baad mamoo wäd. Magawatsiig hõm sahõnh hẽ, a hã P'op Hagä Do anoo do mamoo wät do pan'aa. ⁶ Tii d' ÿ wén karën mabad'oo, edaa däk do hyb n'aa ÿ radaj'ëëp. P'op Hagä Do hã ÿ kan'oo däk ÿ dajëp bã. ⁷ Tak'ëp wajaah doo, tsyym kas'ÿÿ do hadoo paa ÿÿh. Tak'ëp ÿ moo wäd wät Jesus ky n'aa ÿ her'oot do hã. ÿ haja däk hã ÿ P'op Hagä Do karën doo. Tsyym kas'ÿÿ doo, wajaah do kajaa do hadoo ÿÿh. Dooh paa hëp ÿ ÿ eréd bã Jesus hã ÿ h'yy ka'eeh doo. ⁸ Hÿ jawén, p'aa hënh Jesus bahyng bã, ÿ gadoo da ÿ moo wät do sãm, P'op Hagä Do karën doo da ÿ moo wäd wät do sãm. Jesus Kristo, baad had'op doo, nes'õõs doo me sahõnh hẽ sa hã ky n'aa etyy doo, anoo da hã ÿ tii. Hã ÿ had'yyt nado tabanoo. Tanoo né da ta hã baad gad'aa do sa hã na-ããj né hẽ.

Tsimoot hã Paw-Ro maher'oot nyy d' rabad'oo ta hã ky n'aa hahỹyh

⁹ Ỹ karën paawä nyyw hẽ mabana wẽ ỹỹ, ¹⁰ Demas ỹ teréd wät do hyb n'aa. Badäk hahỹỹ hã habong do P'op Hagä Do hã h'yy kana'eeh do rah'yyb padëëk do hã tah'yyb däg däk, takamahñn kån, ỹ tawén eréd hõm. Tesaronika hënh tabahõm. Èr hỹj hadoo do Keresën häd näng do ahõm Garata häd näng do häj n'aa hënh. Tiit ahõm Dar-Masija hënh. ¹¹ Jããm né Rukas haym hata ỹỹ. Mabana bä da, ỹ karën mamana a sii Maah-Ko. Ỹ karën ỹ tamoo masa. ¹² Tikiko ỹ mejõ hõm Epeso panang hënh tabahõm hyb n'aa, t'ĩ hënh tamasa hyb n'aa. ¹³ Mabana bä da mamana a sii saror ỹ hebaan doo, aj'yy Kar-Pos häd näng do wẽ ỹ eréd däk doo, panang Torowas häd näng doo bä. Mamana na-ãäj hẽ ma kahé bãh kerih doo, kap'õøj däk doo. Mamana na-ãäj hẽ ta byyh s'ëëb ta hã kerih do na-ãäj né hẽ. Ta ti né tak'ëp ỹ karën up doo.

¹⁴ Aresãn, sapaar s'ëëb moo hew'ëët doo, hajõng nesaa do tamoo wät hã ỹỹ. Tak'ëp Hyb N'aa Jawyk Do ky n'aa etyy da tii. ¹⁵ Baad mamatakä õm Aresãn narejãã hyb n'aa. Tak'ëp né hẽ tahyb n'aa wareem Jesus ky n'aa èr her'oot do hã. Èr her'oot do majĩ né tii.

¹⁶ Jããm né hẽ pooj jé hã ỹ rakamaj'ĩ do ky n'aa ỹ her'oot noo gó, tabad'op hẽ ỹ rahadaa hõm ỹ raky masa hyb n'aa paawä. Ỹ karën P'op Hagä Do mabaan hõm ti ỹ ramanasa doo. ¹⁷ Ỹ né paawä neheda sa hã, P'op Hagä Do ti ỹ tahada, ỹ tah'yyb hej'oonh. Ti hyb n'aa, sahõnh hẽ Jesus ky n'aa ỹ hajaa ỹ her'oot sahõnh hẽ Judah buuj nadoo do sa hã. Ỹ P'op Hagä Do ed'ëëp ỹ radajëëb mahñnh. ¹⁸ Tak'ëp Hyb N'aa Jawyk Do ỹ ted'ëëp da sahõnh hẽ nesaa do mahñnh. H'yyb nyyw gó ỹ tamahũũm da hỹ pong jé tabag'ããs bä.

Taw'ãäts hẽ P'op Hagä Do ji j'aa etsëe had'yyt hẽ. Ỹỹ. Tii d' né hẽ. Taw'ãäts hẽ.

¹⁹ Mamaher'ood Pisiir, ta patug Akira daheeh, ỹ hyb n'aa esee sa hã. Mamaher'ood na-ãäj hẽ Onesip, ta tób yt haj'eenh do na-ãäj né hẽ, ỹ hyb n'aa esee sa hã. ²⁰ Eras baym Korĩn bã. Toropimo ỹ eréd sooh panang Mirét häd näng doo bã, nahëe näng do hyb n'aa. ²¹ Ỹ karẽn mahyb n'aa bawaad tabahahëem do pooj jé makajaa hyb n'aa babä. Ajyy Ew-buh, Pudẽn, Rĩn häd enäh doo, ỹynh Karaw-Dija häd näng doo, hajök ta wób Jesus hã h'yy ka'eeh do na-ãäj hẽ, õm mã rahyb n'aa esee. ²² Tak'ëp Hyb N'aa Jawyk Do hã ỹ ky n'aa etsëe a h'yyb tym gó tabawäd had'yyt hẽ hyb n'aa. Ỹ karẽn P'op Hagä Do ky enyym sahõnh hẽ bẽ hã. Jããm hẽ kä.

Pop Hagä Do Panyyg Hanäm Do Hahÿÿh
 The New Testament in the Nadëb language of Brazil (BR:mbj:Nadëb)
 O Novo Testamento na língua Nadëb do Brasil
 copyright © 2011 Wycliffe Bible Translators, Inc.

Language: Nadëb (Nadëb)

Translation by: Wycliffe Bible Translators

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nadëb

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-29

PDF generated using Haiola and XeLaTeX on 13 Mar 2019 from source files dated 12 Mar 2019

c5681c4e-55f8-5b64-badf-af07c5e28afc